

Taglia posteriura e levgiaments fiscals

Intervenziuns persunalas davart dumondas fiscalas da Jan Koch (pps), Beatrice Baselgia (ps) e Michael Pfäffli (pld)

DA MARTIN CABALZAR

■ **Dapi l'onn 2010 han passa 2000 fraudaders nizzegià la chaschun da denunziar sezs lur fraud da taglia. Al maun public ha questa pitschna amnestia purtà in retgav posteriur da 47 milliuns. Plinavant ha il chantun Grischun concedì l'onn 2015 levgiaments da taglia da passa set milliuns.** Quai resorta da la resposta da la regenza e las duas intervenziuns parlamentaras da deputada *Beatrice Baselgia* (ps Razén) e *Michael Pfäffli* (pld Engiadin'Ota). Plinavant è la regenza grischuna pronta da prender encunter in'incumbensa parlamentara da la fracziun da la pps respresentada tras *Jan Koch* (pps Tschintg Vitgs) che pretenda da renunziar en l'avengnir a l'obligaziun d'inoltrar la taxaziun da taglia sin palpì e da suttascriber a maun las decleranzas. Ina moziun correspundenta dal cusseglier dals chantuns *Martin Schmid* (pld GR) è era vegnida approvada dal parlament federal. Tenor la regenza fiss la realisaziun pussaivla gia per l'onn da taxaziun u per l'onn fiscal 2020.

Ina pitschna amnestia da taglia

Dapi 2010 datti en Svizra ina pitschna amnestia da taglia. Tenor questa ston persunas che han sezzas annunzià in fraud fiscal pajar ina taglia posteriura per ils ultims 10 onns ed esser prontas d'acceptar in supplement da tschains da retard per ils onns manchentads. En cas d'ierta vegnan resguardads ils ultims trais onns avant la mort. Sin fundament da questa amnestia fiscala n'è l'auto-denunzia betg chastiabla. Damai ch'il chantun Grischun n'ha betg respundì ad ina dumonda da l'emisus «10 avant las 10» ha la deputada *Beatrice Baselgia-Brunner* (Domat) empruvà d'obtengnair las infurmaziuns necessarias cun inoltrar ina dumonda parlamentara en il cussegl grond. Tenor la resposta da la regenza



Ils deputads da san. Jan Koch (pps), Beatrice Baselgia (ps) e Michael Pfäffli (pld) s'occupan en lur intervenziuns da dumondas fiscalas.

MAD

hai dà da 2010 fin 2017 betg main che 2030 auto-denunzias. La facultad declerada è nudada cun 724 milliuns. Las entradas ch'ins ha fatg transparentas posteriuramain muntan a bunamain 18 milliuns. Al chantun ha quella amnestia purtà posteriuramain radund 20 milliuns, las vischnancas han pudì incassar posteriuramain radund 18,6 milliuns. La finala han confederaziun, chantun e vischnancas incassà summa summarum radund 47 milliuns francs taglias posteriuras.

879 auto-denunzias per 2017

I dat en egl ch'il dumber da las auto-denunzias è creschì l'onn passà a moda considerabla da 290 cas sin 879 cas. Uschia ha il ferm augment da las auto-denunzias da l'onn passà era laschè crescher considerablamain las pendenzas. Tenor la regenza na pon quellas betg vegnir reducidas immediatamain cun il persunal existent, cunquai ch'ins sto magari curreger fin a 10 onns fiscals cun ina suletta auto-denunzia.

La regenza vegnia perquai a la conclusiun d'examinar la pussaivladad da crear ina plazza temporara u d'occupar dublamain ina plazza che vegn libra l'onn proxim en consequenza d'in pensunament. Uschia possian dad ina vart vegnir realisadas entradas supplementaras considerablas era per las vischnancas. Da l'autra vart possia era vegnir stgaffida la segirezza giuridica per ils pajataglia pertutgads.

Las raschuns da la taglia posteriura

Il grond augment da las atgnas denunzias en ils ultims dus onns ha tenor il manader dal servetsch giuridic da l'administraziun chantunala da taglia *Toni Hess* pliras raschuns. Dad ina vart haja l'obligaziun dal stgomi d'infurmaziun per eliminar frauds da taglia sur cunfin effectua in nov sensoritar ils pertutgads. Secundo concernan radund 300 da las 879 auto-denunzias immobiglias en Italia, Portugal e Spagna. Questas immobiglias na sajan betg sutta-mess – cuntrari als contos en l'exteriur – a

la taglia en Svizra. Ellas stoppian dentant tuttina vegnir inditgadas sin la decleranza da taglia. Er il fatg ch'il secret da banca possia in di crudar dal tut er en Svizra haja animà blers pajataglia ad auto-denunzias. Plinavant possian singuls cas da fraud da taglia che sajan vegnids publics tras las medias avair gi in tschert effect preventiv sin eventuels fraudaders, manaja Hess.

Levgiaments fiscals per interpresas

Tenor la lescha da taglia dal chantun Grischun po la regenza conceder ad interpresas levgiaments da taglia. Sco quai che l'interpellant *Michael Pfäffli* (S. Murezzan) constatescha haja la regenza adina puspè applitgà quest instrument per augmentar l'attractivitat dal lieu. Da la regenza ha Pfäffli vulì savair la summa totala che la regenza ha concedì sut il titel dal levgiament da taglia per interpresas per ils proxims quatter onns e co tals levgiaments sa repartian procentualmain sin las 11 regions grischunas. E la finala

era tge effects che quests levgiaments d'impostas hajan sin la valitaziun dal potenzial da resursas e consequentamain sin la gulivaziun da resuras tenor la gulivaziun da finanzas dal Grischun.

En sia resposta accentuescha la regenza ch'ella possia conceder levgiaments d'impostas per meglierar l'attractivitat dal lieu per novas interpresas u per interpresas existentas cun ina midada essenziala da lur activitads. La finamira da questas mesiras saja da promover las investiziuns e la creaziun da posts da lavur per uschia vivifitgar in lieu economic er a lunga vista.

Concedì 2015 bun set milliuns

L'autezza dals levgiaments da taglia dependian dal gudogn che las interpresas han realisà l'onn fiscal. Uschia possian ins eruir sulettamain las cifras dals onns passads che sajan gia vegnids taxads definitivamain per las impostas. Per l'onn 2015 hajan quests levgiaments da taglia muntà a bun set milliuns. Il chantun haja renunzià a radund 3,7 milliuns, las vischnancas a radund 3,6 milliuns e las plaivs a 389 000 francs. Sa basond sin il secret da taglia n'è la regenza betg pronta d'infurmar davart la repartiziun regionala da quests levgiaments, damai ch'in publicaziun lubissia da trair conclusiuns sin interpresas concretas en la regiun pertutgada.

Tar la fixaziun dal potenzial da resursas vegnain mo gudogn e chapital che vegnan efectivamain era sutta-mess a la taglia resguardads, scriva la regenza. Sch'il cussegl grond saja dentant da l'avis ch'ils levgiaments d'imposta en vigur n'hajan nagin effect sin l'establiment da novas interpresas stuessia questa pussaivladad da conceder levgiaments vegnir stritgada en la lescha. Quai na saja dentant betg l'imaginaziun da la regenza e correspundia era betg cun la realitad economica, punctuescha la regenza.